

TADARUS: MENYEMAI CINTA AL-QURAN



Pengenalan

Bulan Ramadan adalah bulan Al-Quran dan Allah SWT memuliakan bulan ini kerana padanya diturunkan Al-Quran. Ia adalah hadiah terhebat yang pernah Allah SWT anugerahkan kepada umat Nabi Muhammad SAW. Maka dengan itu adalah tidak wajar kita mensia-siakan peluang dalam merebut manfaat dan kelebihan daripadanya.

Bahkan Allah SWT juga telah menghadihkan satu malam Istimewa buat kita semua iaitu Lailatul Qadar, malam yang lebih baik dari seribu malam. Maka penuhilah Ramadan dengan amal ibadah, dan jangan pula disia-siakan walaupun sesaat. Antara amalan yang sering kita jalani ialah amalan bertadarus.



Asal perkataan tadarus

Perkataan tadarus berasal dari perkataan Arab iaitu tadarasa. Kata akarnya ialah darasa bermakna belajar dan mengkaji. Apabila ditambah dengan huruf ta dan alif mad, maka a akan menjadi tadaras yang bermaksud saling belajar dan mengkaji.

Perkataan ini menunjukkan bahawa adanya penyertaan daripada orang lain sekurang-kurangnya dua orang untuk belajar dan mengkaji.



Asal perkataan tadarus

Justeru apabila kita mengaitkannya dengan Al-Quran, maka tadarus Al-Quran membawa maksud kita saling dan sama-sama membaca Al-Quran di samping mendengar, mengajar, belajar dan membetulkan bacaan setiap peserta.

Dengan demikian bacaan dan pemahaman kita akan bertambah baik. Inilah sunnah terbesar yang diamalkan oleh Nabi SAW bersama-sama Malaikat Jibril a.s pada setiap malam Ramadan.



Kelebihan mengamalkan sunnah tadarus

01 Mendapatkan pahala yang berlipat kali ganda dengan hanya membaca 1 huruf Al-Quran yang mana akan mendapat ganjaran sepuluh kebajikan. Seperti dalam sabda Rasullullah SAW:

“Barang siapa yang membaca satu huruf dari kitab Allah (Al-Quran) maka ia mendapat satu kebaikan. Setiap kebaikan itu dibalas dengan sepuluh kali ganda. Aku tidak mengatakan: “Alif Laam Miim” satu huruf, tetapi Alif satu huruf, Lam satu huruf, dan Mim satu huruf.”

Riwayat at-Tirmizi.



Kelebihan mengamalkan sunnah tadarus

- 02** Dapat memperbetulkan bacaan dan sama-sama mempelajari Al-Quran. Meskipun kita tidak dapat membacanya dengan lancar, namun kita meyakini bahawa setiap usaha kita, susah payah kita akan mendapat pahala. Berdasarkan hadis, "Rasulullah SAW bersabda: "Orang yang membaca Al-Quran dan ia mahir membacanya, maka ia bersama para malaikat yang mulia. Sedangkan orang yang membaca Al-Quran dengan tersangkut-sangkut dan berasa susah dalam membacanya, maka baginya dua pahala." Riwayat Muslim.



Kelebihan mengamalkan sunnah tadarus

- 03** Memperoleh ketenangan dan kebahagiaan hati. Dengan tadarus Al-Quran juga seseorang itu akan memperoleh ketenangan jiwa dan kedamaian hati sepertimana firman Allah SWT dalam surah al-Isra', ayat 82:
- "Dan Kami turunkan dari Al-Quran suatu yang menjadi penawar dan rahmat bagi orang-orang yang beriman dan Al-Quran itu tidaklah menambah kepada orang-orang yang zalim selain kerugian."



Kelebihan mengamalkan sunnah tadarus

- 02** Menjadi manusia paling baik.
- Nabi SAW sangat menggalakkan umatnya untuk sentiasa mempelajari ilmu Al-Quran seperti mempelajari cara bacaan di samping mempelajari ilmu tajwid. Ini bertujuan untuk kita mahir dan paling penting dapat membaca dengan baik contohnya dari segi makhraj dan sebutan. Setelah itu kita dituntut untuk mengajar Al-Quran kepada anak-anak kita, keluarga, rakan-rakan dan masyarakat. Nescaya Allah SWT akan mengangkat darjat mereka yang belajar dan mengajar Al-Quran.



Kelebihan mengamalkan sunnah tadarus

- 05** Mendapat Syafaat (pertolongan) di Hari Kiamat. Al-Quran akan menjadi saksi dengan segala tindakan dan perkara yang kita lakukan terhadapnya sama ada membaca, menghafal, mentadabur serta bertadarus. Diriwayatkan dari Muslim dari Abu Umamah r.a berkata: "Saya mendengar Rasulullah SAW bersabda: "Bacalah Al-Quran kerana sesungguhnya Al-Quran itu nanti pada hari kiamat akan datang untuk memberi syafaat kepada orang yang membacanya."



Kelebihan mengamalkan sunnah tadarus

- 06** Menghidupkan hati yang kosong. Hati manusia mesti sentiasa dibersihkan dan dihidupkan. Ia mungkin mati kerana jauhnya kita dengan Allah SWT. Kita tidak menunaikan tanggungjawab kita sebagai hamba-Nya. Maka hati kita mati, keras dan tidak gentar apabila ayat-ayat Al-Quran dibaca. Sedangkan Allah berfirman dalam surah al-Anfal, ayat 2: “Sesungguhnya orang-orang yang beriman ialah mereka yang bila disebut nama Allah gemetarlah hati mereka, dan apabila dibacakan ayat-ayat Al-Quran bertambahlah iman..”.



Kelebihan mengamalkan sunnah tadarus

- 06** Mengeratkan Ukhuwah Fillah.
- Kita melaksanakan tadarus dalam keadaan hati kita tenang adalah untuk mencari reda Allah. Kita dipilih oleh Allah SWT dan diberi kekuatan untuk hadir ke majlis tadarus bersama-sama dengan keluarga dan rakan-rakan.
- Bahkan kita juga mungkin tidak mengenali orang lain yang turut sertainya. Maka manfaat besar dari tadarus Al-Quran adalah dapat menguatkan persaudaraan sesama muslim. Mereka yang bertadarus Al-Quran baik di masjid atau di rumah hakikatnya mereka sedang menyambung tali persaudaraan sesama Muslim yang lain.



Kesimpulan

Inilah di antara kelebihan kita menghidupkan amalan tadarus yang mungkin kita tidak sedar. Meskipun demikian, kita sering melihat aktiviti ini kurang mendapat sambutan. Amat rugi sekali jika kita tidak berlumba-lumba untuk merebut ganjaran yang telah dijanjikan oleh Allah SWT kepada kita.

Janganlah alasan tidak pandai mengaji, malu, takut dan sibuk menjadi halangan untuk kita menghidupkan tuntutan sunnah ini yang hanya di bulan Ramadan, bulan al-Quran. Itulah tema bulan ini, itulah pesta dan festival yang sepatutnya dihidupkan dan disemarakkan dengan bersungguh-sungguh dan disertai oleh semua lapisan masyarakat Islam.



Sumber

[https://www.bernama.com/bm/tintaminda/news
.php?id=2284591](https://www.bernama.com/bm/tintaminda/news.php?id=2284591)



Terima Kasih